

Naib Canselor UUM meninggal dunia

Oleh DALIZA ARIFFIN
dan ROSMAWATI MION

ALOR STAR 23 Mei — Naib Canselor Universiti Utara Malaysia (UUM), Prof. Datuk Dr. Ahmad Fawzi Mohd. Basri meninggal dunia di Hospital Selayang, Selangor hari ini kerana menghidap penyakit *septicaemic shock* yang dideritainya sejak setahun lalu.

Allahyarham menghembuskan nafas terakhir pada pukul 4.47 petang di hadapan isteri, Datin Aishah Ibrahim dan tiga daripada empat orang anaknya.

Allahyarham Ahmad Fawzi, 56, yang berasal dari Kampung Belanja Kiri, Parit, Perak dimasukkan ke Pusat Perubatan Kedah (KMC) pada 5 Januari lalu dan kemudiannya dipindahkan ke Hospital Selayang pada 26 Januari untuk rawatan lanjut.

● Belasungkawa Ahmad Fawzi — Muka 10

Perdana Menteri, Datuk Seri Abdullah Ahmad Badawi sempat melawatnya di KMC di sini pada 21 Januari lalu ketika umat Islam menyambut Aidiladha.

Allahyarham Ahmad Fawzi yang telah dilantik sebagai Pengerusi Majlis Latihan Khidmat Negara (MLKN) pada Disember 2003 merupakan Naib Canselor UUM kelima dan memegang jawatan tersebut sejak 2 Oktober 2001 sehingga kini.

Beliau pernah mencatat sejarah tersendiri apabila menjadi ahli akademik pertama dari UUM yang dilantik ke jawatan Naib Canselor.

Kerjaya Ahmad Fawzi bermula sebagai tutor di Universiti Kebangsaan Malaysia (UKM), kemudian menjadi pensyarah di UUM pada 1984.



AHMAD FAWZI

■ Lihat muka 4

Naib Canselor UUM meninggal dunia

sebelum dilantik sebagai Dekan Sekolah Pengajian Asasi pertama di universiti tersebut dari 1984 hingga 1989.

Allahyarham yang mempunyai latar belakang dalam bidang ketenteraan selama 26 tahun itu pernah menarik perhatian ahli-ahli politik semasa memegang jawatan Timbalan Naib Canselor (Hal Ehwal Pelajar), apabila mencadangkan agar UMNO, Pas dan

Keadilan mengadakan pertemuan bagi merapatkan kembali perpaduan Melayu yang mulai renggang.

Dalam bidang korporat, beliau terlibat secara aktif sebagai ahli Lembaga Pengarah Yayasan Pendidikan Mara dan Pengerusi anak syarikatnya, YPM Trading Sdn. Bhd., serta Pengerusi Unitama Management Holdings Sdn. Bhd., dan tiga anak syarikatnya.

Sementara itu, Allahyarham juga turut memberikan sumbangan yang tidak ternilai kepada warga media di Kedah menyebabkan beliau dilantik menjadi penasihat kepada Kelab Media Kedah.

Jenazah Allahyarham dijangka tiba di Lapangan Terbang Sultan Abdul Halim lewat malam ini dan akan dikebumikan di Jitra esok.

UUM/5548/UUM/24.05.2005/p.1(1)